



**Bangkok bar kitsük kironng
lendong nung asür 30 jungogo**

**Kejriwal-i PM den ajuruteptsü
mepeshia shiti zülü**



The Naga Rising (TNR)-i jangjatsür

Dimapur, July 14, 2026 (TYO): The Naga Rising (TNR) ajanga Rising People's Party (RPP) aser Naga People's Party (NPF) loktepbä dak sendakba osang jangjashitsüogo.

Nagaland nung sorkar temelenzüker ka asütsü aser temelenshi bener arutsü atema The Naga Rising (TNR) ajanga RPP tentet. RPP ya independent entity ka ama inyaksangshitsü saka TNR den tesentaktep alitsü ta ser tenteta liasü ta The Naga Rising (TNR)-i sangdong ka nung metetdaksü.

Joel Naga-i anir TNR züngsem ishika nem party yangertsü tebilemtsü khuret agütsü. TNR-i party len anitsü aser parnok inyaksangshiba pusema nungittsü nükjidong liasü saka rongsen peria

maliba den onoki teinyaktsütem meinyaktetba ajanga party meyaritet ta TNR-isa ashi.

TNR dangi RPP-i NPF den lokteptsüba tebilemba bener arudang onoki RPP lennirtem dang party taküm lidaktsütsü atema lenmangtem bushiteptsü shidanga liasü. Ajisüaka koda masüba ajanga parnok lokteptsüsa aküm aser iba tia ajuruba atema sasar ta TNR-isa ashi.

RPP züngsemtemi bendanga agüja tenzüka atema pelar. RPP-i akokba tashi inyakdangogo saka party ka am alia aotsü mekoktet. Parnok wadang tasen nung takok ngudakjang ta onoki moatsür aser maneni temenentem anema raratsü imlar ta TNR-isa metetdaksü.

Assam tzümetsüng tamajungba akümer

Guwahati, July 14, 2026 (Agencies): Assam nung July 14 nü tzümetsüng tensa tamajungba kümogo aser nisung ka asüba osang lir.

Taküm tzümetsüng ajanga lendong balala nung nisung asem süogo aser nisung 37,000 tema dak kongshia lir ta Assam State Disaster Management Authority (ASDMA)-i tanü ashi.

Sonitpur district kübok Naduar revenue circle nung nisung ka asü ta ASDMA indang daily flood bulletin nung ashi.

Tzümetsüng ajanga Sonitpur, Dibrugarh,

Lakhimpur, Dhemaji, Jorhat aser Sivasagar district tem kongshia lir aser iba ajanga revenue circles 12 aser yimtsüng 99 nung nübortem timtemer.

Tzümetsüng tensa ajurua alidak relief distribution centres 20 ajanga relief materials agütsür ta ASDMA-isa ashi.

State Disaster Response Force (SDRF)-i tesüiba ghonda 24 tsüngda Sonitpur district nungi nisung 16 kümzkogo.

Tzümetsüng ajanga alu 1,103.94 hectares metsümbanga lir ta ASDMA-isa metetdaksü.

ENNWO-i ENNWA indang jangjashitsür

Dimapur, July 14, 2026 (TYO): Eastern Naga National Worker's Association (ENNWA) ya Naga-political telok ajak adenba welfare body ka lir aser iba nung Eastern Nagaland nung alirtem shimoker.

ENNWA ya Convener, Secretary aser tanga ketdangpurtemi anir inyaker aser iba sabang nung lennirtemi asadanga jembitsü aser amalitep alitsü atema onüktem lemsateper ta ENNWO Secretary Pongba Konyak aser Convener Yamthong Yimkhiung nati sangdong ka nung ashi.

ENNWA indang nükjidongji Naga nunger ajak den külemi Indo-Naga yimten ken o tekaraba nung aser ajaki agizükttetsüsa latettsü atema lir ta tenatisa ashi.

Frontier Nagaland Territorial Authority (FNTA) ya India sorkar, ENPO aser state sorkartem indang onük ka lir.

ENNWA ya Naga nunger yimten telok balala den sendaktepa aliba Naga National workers telok ka lir aser onoki ajaki agizükttetba aser akhümtsübuba Indo-Naga yimten latettsü atema inyaktsü tenangzüka lir ta ENNWO ketdangpurtemi ashi.

ENNWA indang tebilemba aser taginüba ajak Naga nunger putiotsü aser yimtenren temeten den putepa asütsüla. Framework Agreement nung ken o kar meputep aser metokmeperi ali ka asü nunga November 17, 2017 nü "Agreed Position" ajanga peritsüogo ta parnokisa metetdaksü.

FA aser AP ya meyipa magitetba political documents lir aser ENNWA o tanüngba Naga nungeri India sorkar dang item kulikakettem akhümtsübuttsü aser Nagaland o North East India nung teti atema yimjung bener arutsü inyakang ta rongshitsüla ta ENNWO-isa ashi.

IED pokdaksürtem bushiteper; Havildar Mohd Iqbal nem tetushi agütsü



Lt. Gen. Vikas Lakhera-i Havildar Mohammad Iqbal nem tetushi agüja narajung ka yutsüba angur. (Dimapur, July 14)

Dimapur, July 14, 2026 (TYO): Hombarnü Chümoukedima (A) village-Shokhuvi lenmang nung IED ka apokdang army jawan ka asü aser pezü yiruba sülen security forces aika mapa lezmükja bushisüngdang südar.

Assam Rifles aser Nagaland police nübo aika mapa lezmüksüogo. Chümoukedima (A) village-Shokhuvi lenmang ajunga shibangogo aser senzusenbongertem tanga lenmang ka ajanga senzüdar ta PRO Defence sangdong ka nung ashi.

Iba lendong nung asüba sepai ya Assam Rifles nung driver Havildar Mohd Iqbal liasü ta jangjaogo. Pa ya Assam Rifles Training Centre & School, Shokhuvi, Nagaland nung mapa lezmüka liasü.

Havildar Mohd Iqbal ya Jammu & Kashmir kübok Poonch district Mohra village nungi lir.

Iba lendong nung yirurtem ajak Christian Institute of Health Sciences and Research (CIHSR) nung anepalutsü atema anir ao

aser parnok ajak tajungba lir ta osang angazüker.

Mongubar anüngdang Assam Rifles Training Centre & School (ARTC&S), 3rd Mile, Dimapur nung Mohd Iqbal nem tetushi agütsüba sentong ka agiogo.

"Iba bomb pokdaksürtem ya Nagaland tsükchirtem lir. Army aser Assam Rifles-i security atema kechi teinyaktsü lir inyaktsü anungji nübortemi iba tatalokba ajanga Nagaland nung yimjung tensa meraksatsü ayongzüker" ta Lt. Gen. Vikas Lakhera, AVSM, SM, Director General of Assam Rifles (DGAR)-i ashi.

Iba lendong nung yirua alir par pezü temang tajungba lir aser parnok rongnung Assam Rifles nung Assistant Commandant ka dena lir ta DGAR Lt. Gen. Lakhera-isa ashi.

Havildar Iqbal indang temang ya July 15 nü Jammu and Kashmir kübok Poonch district-i bener ao aser idakji asüpila sentong agitsü ta paisa ashi.

ARTC&S, 3rd Mile nung agiba sentong nung Lt. Gen. VM

Bhuvana Krishnan, PVSM, AVSM, YSM, General Officer Commanding (GOC), Eastern Command; Lt. Gen. Vikas Lakhera, AVSM, SM, Director General of Assam Rifles (DGAR); Lt. Gen. Girish Kalia, AVSM, VSM, GOC, 3 Corps; Maj. Gen. Harinder Singh Mavi, Inspector General, Assam Rifles (North); aser Brig. CS Pathania, VSM, Commandant, ARTC&S nunger aden.

NPCC-i Chümoukedima nung IED apokba aitsür

Assam Rifles Training Centre (ARTC), Shokhuvi, Chümoukedima anasa IED bomb apokba lendong nung Assam Rifles sepai Havildar Mohd. Iqbal asüba aser nisung pezü yiruba khukhua aitsür ta Nagaland Pradesh Congress Committee (NPCC)-i metetdaksüogo.

"Onoki Havildar Mohd. Iqbal'er kibong den asükhu lemsateper. Pai linük tenzüka wadang nung noktakang taküm bendanga agütsüogo. Maneni iba lendong nung yirua alir ajak tekaraba nung taneptsü angutsü sarasademtsür" ta Communication Department, NPCC-i sangdong ka nung ashi.

"Ibala inyakyim ajanga tai maketba nisungtem nem lendong bentsür aruba dang masü saka Nagaland nung alirtemi mapang talangka meranga yimjung bener aruba aser tensa süngjema aliba nung kongshir. Putepshiba aser terenlok lenmang nung maneni Nagaland jajadang ibala mapa inyakba atema sasaa bilemer aser ajaki aitsütsü yim" ta parnokisa metetdaksüogo.

NPCC-isa bangdakpurtem dang jungjunga, shinga tsütsü tejak meshii aser mapang telatet yur bushisüngdang asütsü aser aibelenertem maitsü jangiateta tapet temerenshi agütsütsü ayongzükogo.

Manipur nung Assam Rifles sepai tepsetba atema 3 apu

Imphal, July 14, 2026 (Agencies): July 6, 2026 nü Manipur kübok Ukhrul district nung Assam Rifles ana tepsetba lendong dak sendakba nung sepaitemi nisung asem puogo ta Manipur Police-i Mongulbarnü ashi.

Osang tejangja kar angazükba sülen TM Kasom, Litan aser Sikibung tesemtem nung mita aodang nisungtem apu.

Sepaitem amakba dak sendakba nung shilem agirtem aputsü atema maneni inyakdar ta police-isa ashi.

"July 6 nü Ukhrul district nung sepaitem amakdang shilem

agirtem aputsü atema TM Kasom, Litan aser Sikibung nung sepaitemi mita odor. Nisung asem puogo" ta police-i sangdong ka nung ashi.

July 6, 2026 nü Assam Rifles convoy ka Shangshak nung 40th Assam Rifles Battalion headquarters-i meyipa aodang telungpurtemi amak.

Iba lendong nung Warrant Officer Balwant Singh aser Havildar C.M. Singh na asü.

Külen, Tangkhul Naga Long (TNL) nung Working Committee-i civilians pezü pur aoba osang metetdaksüogo.

Sepaitemi search operations inyakdang civilian pezü pur ao ta Tangkhul Naga nunger asoshi tematiba teloki ashi.

Civilian pezü ya Wunghphayo Kasar (24), AS Ninglum (29), Yaoreingam Lungleng (24) aser Vareiyong Lungleng (56) nunger lir. Parnok ajak ya Kamjong district kübok Sharkaphung (Sikibung) nunger lir ta TNL-i ashi.

Par pezü ya combing operations mapang pur ao aser ghonda 24 tsüngda mechiokra state sorkar anema lungkak aittsü ta TNL-isa tekümdangtsü osang metetdaksüogo.

OKM-i Dr.S.C.Jamir Meritorious Award agütsü



OKM ajanga Dr. S.C.Jamir Meritorious Award 3 buba senpet agütsüba sentong nung mejeta jaoker Wb.Imkongmar Imchen-i Kr.Impunenla Pongen nem senpet agütsü mapang tangokba noksa.

Mokokchung, Chiteni/July 14 (TYO): Ongpangkong Kaketshir Mungdang-i (OKM) ketdangsüa agütsüba Dr. S.C.Jamir Meritorious Award 3 buba senpet agütsüba sentong tanü Whispering Winds, Mokokchung nung kaogo.

Iba senpet Ongpangkong Kaketshir Mungdang-i HSLC tatidang nung alakteta takok angur nem agütsür aser taküm küm Kr.Impunenla Pongen-i HSLC Examination 2026 nung 95.17 nguteta Rank 17 buba nung takok ngutet nung lai Dr.

S.C. Jamir Meritorious Award ya agizükogo. Impunenla ya Mangmetong nung Wb.Temsuwati jala aser la United Christian Higher Secondary School nung züngya liasü aser tang la ya Little Star Higher Secondary School, Dimapur nung Arts züngdagi.

Tanü iba sentong nung mejeta jaoker Wb.Imkongmar Imchen-i Kr.Impunenla-i iba ama takok tajung ngutetba ajanga Ongpangkong nüburtem nem khonang bener arutsüogo ta tenüngsanga ashi. Paisa Dr.S.C.Jamir aser par kibongi

iba ama senpet agüja lanurtem tazüngba jenjang nung tajungtiba leni anitsü mapatong inyakba ya nübur asoshi temoatsü tulu lirta Dr.S.C.Jamir kibong nema tenüngsang agüja jemb.

Ongpangkong nungerin 1940's mapang nungi shisaliok tsütsülen kanga dang temelung agüja bushi aser inyak, anungji iba senmang tajungji mesamadaktsüi ano tanü lanu asensor aser kaketshirtemi meranga azüngtsüla ta adenshia aliba kaketshirtemi ajungshia Imkongmar-isa jemb.

Tsüngrem lenisüba jazüka Settsü Baptist Arogo Pastor Rev.Manen Lkr ajanga sarasadema sentong tenzükba den Ao Kaketshir Mungdang Tir Sb.Lanulemba Longchar, OKM Tir Sb.Tongpangmangyang Kichu, senpet agizüker Kr.Impunenla Pongen Dr. S.C. Jamir Meritorious Award Trust Committee, Convener Wb.Senti Walling aprnokia shilem balala agia jembiba den Kinunger Baptist Arogo Pastor Rev. Alemtemjen Kichu-i sarasadema sentong tembang aser Kr. Repabenla ketdangsüba nung sentong achayanga agia liasü.

Chümoukedima 'A' anasa IED apokba lendong aitsür

Dimapur, Chiteni/July 14 (TYO): Chümoukedima district nung July 13, 2026 nü Assam Rifles ka asüba atema Nagaland Angh Nand Kishore Yadav-i asükhu lemsatepa liasü.

Pai asür tanüla teti tatem maka tesunep nung anisüngzüktsü asoshi sarasademtsür aser kinunger, külem tenzük den asükhu lemsateper ta ashi. Paisa yirur aliba sepaitem tekeraba nung taneptsü angutsü asoshi sarasademtsür ta ashi.

Angh-i iba azüdokshi khukhua

aitsü aser ketdangsür temi kanga junga bushisüngdanga iba mapa tamajung inyaker nem obendang agütsütsü tamang akar ta ashi.

Western Sumi Hoho (WSH) aser Western Sumi Kukami Hoho (WSKH) ajanga sangdong ka nung Hombar nikongdang Assam Rifles Training Centre and School, Shokhuvi anasa Chümoukedima 'A' tesem nung mejangjaba nisung temi tasü mait mapa tamajung inyaka Improvised Explosive Device (IED) pokdaktsüba asoshi kanga aoksar,

jashir aser khukhua aitsür ta ashi.

Kanga meranga inyaker tesunep bener arua aliba raksatsütsü nükjidong nung iba ama azüdokshi inyaker civilized society nung alitsü metemsü. Nüburtemi amshiba tesem nung remote agi azüoka tapoktsü oset amshiba ya security forces dak tenük yokba kisüng masü saka tai maket civilian tem lendongi yoker, ta ashi.

Kasa lendong asoshi Chümoukedima Village Council-ia sangdong ka nung khukhua aija liasü.

2nd IMPCC senden Kohima nung PIB-i ayongzük

Dimapur, Chiteni/July 14 (TYO): Press Information Bureau (PIB), Kohima ajanga July 13, 2026 nü Akashvani, Kohima nung Dr. Engam Pame, Additional Director General, PIB, Regional Office, Imphal lenisüba kübok 2nd Inter Media Publicity Coordination Committee (IMPCC) meeting ayongzüka liasü.

Iba senden nung Department of Information & Public Relations (IPR), Akashvani Kohima, Doordarshan Kendra Kohima, Central Bureau of Communication (CBC) aser Defence PRO nungi ketdangsürtem dena liasü.

Dr. Pame-i pela agizükba o jembidang IMPCC ya Ministry of Information & Broadcasting, State Government departments, Central Government offices aser public sector undertakings indang media units tsüngta amalitep tajungba akumtsü aser tonglatongsü tajungba asütsü atema tongtipang sapang ka lir, ta ashi.

Iba committee yagi stakeholders tem shisatsü lemsateptsü, tajangshibatam lemsateptsü, communication challenges jembitsü aser lungjemer tajungba nung nüburtem nem osang agütsütsü asoshi maongka agütsür ta pai ashi.

Sorkar indang osang belenshir ama Government of India indang Viksit Bharat 2047 mangdang yariba nung züngsem ajak teinyaktsü kasa lir, anungji sorkar inyaksangshi aser

terenlok mapa nüburtem atongtsü asoshi department ajunga külemi inyaktsüla, ta pai ayongzük.

Department aikati inyakba mapa memeteter, kechiaser itemji junga document mebedener aser mesangdonger, ta Dr. Pame-i ashi. Pai züngsem departments tem dang pei department inyaksangshiba osang IMPCC ajanga lemsateptsü ayongzük aser committee ajanga osang agütsüba ya bendener Ministry of Information & Broadcasting dangi yoker aser iba sülen tim Ministries den lemsateper ta ashi.

PIB, CBC, Akashvani, Doordarshan aser tanga stakeholder departments tem tsüngta telungjem tajungba akatsü ayongzüka Dr. Pame-i senden amenba kisüng masü saka mapang shia sensaksem akaba ajanga amalitep tali akangshitsü aser sorkar osang prokshiba tajungba akumtsü ta ashi.

Iba senden nung June ita züngsem department temi osangtsüsang prokshiba aser outreach mapa inyakba lepa reprangtepa liasü aser aruya aliba ita atema communication plans indang jembia liasü. Züngsem temi osang tem mapang shidak nung agütsütsü aser amalitep nung tashi itshitsü indanga jemb.

Tang nungi tenzüka Kohima nung IMPCC senden ya ita shia mezüng Hokulbar anogo amentsü, ta committee-i telemetba agia liasü.

DC Kohima-i electoral roll revision nung aibelen masütsü ayongzük



Dimapur, Chiteni/July 14 (TYO): Deputy Commissioner & District Election Officer (DEO), Kohima, B. Henok Buchem, NCS-i electoral roll indang Special Intensive Revision (SIR) atema training agia aliba Supervisors tem dang revision mapa tiptema jangja-jangja inyaktsü asoshi Election Commission of India (ECI) ajanga guidelines aser procedures agüja aliba kanga junga angatetsü ayongzüka liasü.

Deputy Commissioner, Kohima indang Conference Hall nung July 14, 2026 nü training sentong nung jembidang, SIR exercise nükjidong ya temsüa aliba voters ajunga electoral roll nung inoktsü aser metemsüba nisung ajunga indoktsü nükjidong nung lir, ta DEO, Kohima ajanga ashi.

Election Commission of India-i iba exercise nung metokmeperi atema kanga junga repranger, anungji ketdangsür temi shia aliba ozüng

aser inyakyim sülen anidaktsüla, ta pai ashi.

ERO, AERO aser Supervisors ya tarutsü nung Booth Level Officers (BLOs) asoshi master trainers lir, anungji nenoki revision inyakyim ajak kanga jangja meteta alitsü nüngdaker, kechiaser nenoki political parties, civil society organization, yimtsüng nung lenirtem aser nüburtem den ajurutepa jembishinü akatsü, ta Buchem-i ashi.

Par parnok dang provisions, instructions aser teti asüngdangba tem kang junga meteta alitsü aser asüngdangyaba mapang tasü ita langzüksü ayongzüka liasü.

Revision inyakyim nung shilem ka ama training ya Electoral Registration Officers (EROs), Assistant Electoral Registration Officers (AEROs), Supervisors aser Booth Level Officers (BLOs) densema electoral officials asoshi agütsür.

GOVERNMENT OF NAGALAND
PLANNING & TRANSFORMATION DEPARTMENT
NAGALAND, KOHIMA

File No. PLN-62/CMCF/UPSC/2023-24 **Dated, Kohima, the 8th July 2026**

ADVERTISEMENT

Application in the prescribed format are hereby invited from eligible, interested local candidates (indigenous inhabitants belonging to Scheduled Tribes of Nagaland) for entrance test to shortlist 30 candidates for availing of coaching at Vajiram & Ravi, New Delhi. The cost for the coaching shall be borne by the Government. Accommodation/transportation cost shall be borne by the student. Candidates who have already undergone UPSC Coaching either from Government or private need not apply.

Application forms can be downloaded from the website at <https://www.nagalandplanning.in>

Eligibility Conditions:

- * Minimum Educational Qualifications: The candidates must hold a Bachelor's degree with at least 60% marks secured from a Recognized University.
- * Candidates awaiting their Bachelor's degree results may also apply, subject to submission of proof of result before commencement of the coaching classes.
- * Coaching offered will be for General Studies with the following optional subjects:

1. Agriculture.	7. Mathematics.
2. Public Administration	8. Sociology.
3. Anthropology	9. Geography.
4. Political Science & I.R.	10. Philosophy
5. History.	11. Psychology.
6. Commerce & Accountancy.	12. Economics
	13. Law
- * Age Limit: A candidate must have attained the age of 21 years and should not be more than 33 years as on 01.01.2026.
- * Selection of candidates: Candidates will be selected on the basis their written test on General Studies (MCQ).
- * Last date of submission: 16th July 2026.
- * Exam date & time: 25th July 2026 (Saturday from 11.00 am to 1.00 PM).
- * Venue for the Entrance test: Capital Convention Centre Hall, Kohima, Nagaland.
- * Publishing of the list of selected candidates: 28th July 2026.
- * Application form: Downloaded form should be printed on A4-size white paper before filling it up. The forms along with I (one) colour passport photo in JPEG format should be submitted via email at upscnagaland@gmail.com.
- * No TA/DA will be provided.
- * Admit cards will be sent through the student's email ID.
- * List of selected candidates will be available in the website <https://www.nagalandplanning.in> and local dailies on 28th July 2026.
- * Classes are anticipated to commence from 3rd week of August 2026.

Sd/-
(Y. KIKHETO SEMA) IAS
Principal Secretary & Development Commissioner.

Wangchuk lumi tenzüker anogo 17 jungogo; lenirtemi lumi anentsü mepeshir



Climate activist Sonam Wangchuk den Cockroach Janata Party (CJP) ngutetsang Abhijeet Dipke nunger tatidang nung ochi mashi inyakyim sendaka aliba aser Union Education Minister Dharmendra Pradhan mapa nungi anetsü khanga Jantar Mantar nung lumia longkak aitba mapang tangokba noksa nung angur.

New Delhi, Chiteni/July 14 (Agencies): Mongolbarnü opposition lenirtem aikati educator aser climate activist Sonam Wangchuk dang pai lumia longkak aitba anentsü mepeshia metetdaksüogo.

Lenirtemi pa health tamajungba küma aoba süoki ia bilemba lemsatepba den NEET aser tanga tatidangtem nung inyakyim meshidakba anema longkak aitba ya parnokia pusemer ta shiogo. Longkak aitba ayongzükertermi ashiba agi, Wangchuk June 28 nü nungi lumi tenzüka sülen pa seret 8.5 ajemogo.

Samajwadi Party tekolakba Akhilesh Yadav-i Wangchuk dang ojang dang lumitsü mepeshia metetdaksüogo, aser ashiba agi BJP-i aniba sorkar nongshitsü merangtsü atema pa taküm lendong nung toktsütsü ya kanga senti lir.

"Onoki Shri Sonam Wangchuk dang lumiba anentsü mepeshir. Pa taküm ya alima ajunga atema kanga senti lir, kechiyong pai humanity aser

tzümopung atema bendanga agütsüba ya democracy atema bendanga agütsüba den kasa lir," ta Yadav-i X nung zülutsü.

Paisa, BJP aija ashiba agi, "BJP sokrar shirnok pai tasü tashi lumitsü mulungteter mesotsü merangdar, iba sokrar ka principle mali aser ochi mashi inyakyim agi sünga lir."

Aam Aadmi Party national convener Arvind Kejriwal-ia Wangchuk dang lumiba anentsü mepeshia metetdaksüogo aser longkak aiba pusemtsü nangzükogo. Taoba Delhi chief minister yagisa pai Brehostibarnü nikongtsütsü Jantar Mantar semdangtsü ta shiogo.

Paisa, Cockroach Janta Party's (CJP)-i Union Education Minister Dharmendra Pradhan mapa nungi anentsü akhangba pusemer ta ashiba den, paper leak asüba nokdangtsü atema tatidang inyakyim melenshitsu ayongzüakogo. Taoba Delhi chief minister Atishi-ia Hombarnü longkak aitba tesem

nung Wangchuk semdangogo.

Kasa mapang nung Trinamool Congress MP Mahua Moitra-ia Wangchuk dang lumiba anentsü mepeshia asündangogo aser ashiba agi, pai linük ajunga nung lanurtem takok ngua longjemdaksüogo.

"Sonam Sir nai lumiba ajanga linük ajunga nung lanurtem ochi obendang atema raraba mapang parnok longjemdaksüogo. Nü nükjidongbo tongogo. Sorkari nü taküm mesüra lanur crore sa crore taküm hau ta mali. Saka nü taküm ya onok atema kanga senti lir. Yimlibilema lumiba anener maneni rarang," ta lai X ajanga ashi.

Nüngutug kaket zülur Arundhati Roy, actors Naseeruddin Shah aser Ratna Pathak Shah aser economist Jayati Ghosh nunger ajaki Wangchuk aser tanga longkak aiterterm dang lumiba anentsü mepeshiba den parnokia Pradhan mapa nungi anentsü atema akhangba pusemer ta ashiba sülen anogo ka lir ano lenirtem aikati pa semdangogo.

PoK ken o: India-i alima kintem dang Pakistan atitsütsü ayongzük

New Delhi, Chiteni/July 14 (Agencies): Pakistan-occupied Kashmir nung tang longkak aita aliba indang jembiba mapang Ministry of External Affairs-i civilian tem dak tashiyim amshiba aitsüogo.

MEA otongdar Randhir Jaiswal-i, PoK nung Pakistan-i tashiyim amshiba atema parnok aitsütsü atema India-i alima kintem ayongzükogo, ta ashi.

"Pakistan-i küm aika parnoki tashiyim agi atsünger aliba tesemtem nung fundamental rights magütsüba aser yimsüsüba tsütsü nüburtem tekübokba jenjang nung toktsüba ajanga Pakistan-occupied Jammu and Kashmir nung nüburtemi longkak aitar, ta Jaiswal-i ashi.

MEA otongdarisa police-i

longkak aitertermi azüoktsü atema tashi tali amshiba aitsüogo.

"Chiyongtsü aser mozü amala tenündakba osettem supply nokdangba den internet shibangtsüogo aser hadir kecha bena maliba nüburtem anema tashi alia amshiba ajanga nisung aika süogo. Iba inyakyim atema alima kintemi Pakistan aitsütsü onoki imlar," ta Jaiswal-i shisem.

Osang ajanga ashiba agi, PoK nung longkak aitba ajanga rongsenketzüng nung nüburtem kanga timtemtepar. Longkak aitertermi wheat flour atema subsidised rates agütsütsü aser electricity amala ken o balala anema longkak aitar. Longkak aitertermisa Pakistan nung oa amenoka aliba migrants tem atema assembly menden 12

mekazüka toktsüba okadaki agizükba dena anemdar. Taiba küm iba amala mesükba longkak aitba sentong ayongzüka agiogo.

Ajisüaka tang longkak aitba ya Pakistan sorkari anti-terrorism laws kübok Joint Awami Action Committee (JAAC) nem tenokdangba agütsüba nungi tenzüka lir.

Tenokdangba agütsüba sülen JAAC lenir Sardar Aman Khan-i India dang teyari meshiogo.

Kasa mapang nung PoK nungi pilar Jammu and Kashmir nungertemi Washington DC, Maryland aser Virginia nung longkak aitogo aser US sorkar dang iba tesem nung meimchir temeden anema inyaksangshia aliba anema jenjang agitsü ayongzükogo.

Hormuz nung rongtem amakba India-i aitsü

New Delhi, Chiteni/July 14 (Agencies): Strait of Hormuz nung rong ana amakba mapang India nunger ka asüba aser ter yiruba sülen India-i iba inyakyim aitsüogo, aser ashiba agi, iba ajanga international tzüim nung teküzmzüka kübok senzüsengponga amokmerener.

Ministry of external affairs (MEA)-i sangdong ka ajanga, MT Al Bahiyah aser MT Mombasa rong amakba ya kanga dang süoki ia agir, ta shiogo. Rong ana nung ya crew 46 liasü aser parnok rongnung 30 bo India nunger liasü.

Sorkarisa, MT Al Bahiyah nung mena aliba India nunger 12 rongnung ka asü aser ka yiruogo. MT Mombasa nung India nunger crew 18 liasü aser parnok rongnung 9 yiruogo aser ana kanga mejungi yirur lir ta ashi.

"Onoki asür kibong den asükhü lemsateper aser yirur alirtem takaratiba nung aneptsü imlaja atar," ta ministry-i ashi.

MEA-i, New Delhi nung Iranian embassy nung deputy chief of mission jaoka rongtem

amakba indang tashishiba agütsüba sülen iba olen ya lemsatepa liasü.

Maneni New Delhi-i, shishilemba dang amshiba rongtem aser civilian infrastructure tem mamaksüla ta ashiba den, iba amala jenjang agiba ajanga tzüim nung shishilemba aser aliba ajunga rongsenketzüng amokmerener, ta shisem.

Tehran aser Washington DC na asendenshir rara tenzüksheba ajanga Strait of Hormuz nokdang aliba mapang tang iba tebilemtsü ya adokogo. Iba tzü lenmang ya totzü aser gas shibelentsü atema alima asoshi kanga tongtibang lenmang ka lir.

Sorkarisa tang asendenshir rarba dak sendakba nung tebilemtsü aliba lemsatepogo. "Asia anüolen asendenshir raratep tenzüka kanga süoki ia bilemba lemsateper, aser yimjung atema rara anentsü asoshi maneni sensaksem tenzüksheba ayongzüker," ta kasa sangdong ajanga metetdaksü.

Kejriwal-i PM den ajuruteptsü mepeshia shiti zülü

New Delhi, Chiteni/July 15 (Agencies): AAP tekolakba Arvind Kejriwal-i Mongolbarnü Ato Kilonser Narendra Modi den E20 petrol dak sendakba nung sensak asemstsü atema pa den ajuruteptsü mepeshia asündangogo. Paisa, fuel station tem nung pure aser E20 petrol alitsü atema maongka agütsütsü aser ethanol-blended petrol ya jenjang tajemba agi ayoktsü mepeshia liasü.

PM dangi yokba shiti nung Kejriwal-i ashiba agi, senden amenba mapang pai technical ken o tem rasa shiner aser nüburtemi pa den ken o balala lemsatepba indang metetdaksüner.

Kejriwal-isa, customer tem nem fuel station tem nung pure petrol mesüra E20 petrol alitsü atema maongka agütsütsü, ta ashi. "Nisung kari pure petrol alinüra aji alitsü atema maongka agütsütsü aser E20 alinertem

nema iba totzü agütsütsü, ta pai ashi.

E20 petrol dak sendakba nung nüburtem den sensak asemba aser tebilemtsü angatetba sülen pai Ato Kilonser dangi shiti zülüogo, ta Kejriwal-i ashi.

AAP tekolakba yagisa, E20 petrol jenjang ajemtsütsü mepeshiba den regular petrol den medemdangra meyokteper aliba totzü yagi mileage ishiba agütsür, ta ashi.

Kejriwal-i ashiba agi, E20 petrol dak sendakba nung tajangshiba lemsateptsü atema par party-i online petition ka tenzükogo. Paisa, nüburtem dang mileage aser tanga ken o dak sendakba nung parnok tebilemba lemsateptsü mepeshia metetdaksüogo.

Kejriwal-isa, PM Modi-i pa nem takaratiba nung appointment ka agütsütsü imlaba lemsatep.



Pan Vyapari Mahasangh züngsemtemi MCOCA aser FDA provisions mashiyimi amshiba, flavoured tobacco nokdangba aser tanga ken o tem atema Azad Maidan, Mumbai nung longkak aitba noksa nung angur.



TIR YIMYIM YIMOBILEM (EDITRIAL)

DIMAPUR WEDNESDAY, JULY (CHITENI) 15, 2026

Kechiba bomb pokloktsü ?

Naga yimten tebilemtsü ken o tatembang küma mejembitetaka, taoba küm ter shibo Nagaland nung Naga nung telok o telok na arishitepa khatepba aser Naga nung o India nung sepaitem na tsüngda injang aser bomb amshia raraba ola-osang mangshii aruogo. Atangji, ibaji Tsüngremi Naga nung meimba yong Forum for Naga Reconciliation (FNR) telok tentetdakja yimjung mapa inyakba ajanga ajangzüktetba yimjung mapang ka asütsü. Ajisüaka, yakanü meimlaika Chümoukedima len Assam Rifles sepaitem mener ooya aliba gari nung bomb pokloktsübaji Nagaland nung alir ajak atema taoksatsüka aser tejashitsüka lir. Iba ama nisung taküm aser alima tensa mapang mapayui mapa tamajung inyakba nisungtemji shitak pua bener maru tashibo, iba ama lendong mapaji shirnoki inyakar ashitsü tasak asütsü. Atangji, nisung mulungjang nung pei pei bilembabo aika alitsü, ajisüaka item ajakji temulung melemtetba jembiba o ka dang asütsü, anungji shitakba kuli mangu tashibo olulu akümer. Aji oda, kari Manipur nung kin asem tsüngda mepetmesü adokba dak sentakba nung Nagaland nung alirtema ayongsemtsü asoshi inyaker südi ta bilemtsüa akok. Ano, karibo India den yimjung nung Naga yimten ken o tembanga jembir telatetba ka dangi marutetba agi tejashiba tamaisü sayur asütsüa akok ta bilema alitsüa akok. Ano, karibo kasa Naga yimten nüchiso asoshi rarar ser nung telok aika lemsadokba agi, parnok rongnung, tenük merem adoka kar timtemdaktsütsü asoshi kari inyakba alitsü akok ta bilema alitsü südi. Item ajakji, atangji, iba lendong atalokba bushisüngdanger Investigation agency-temi tajungba rajema bushisüngdanga alitsü imlar. Aji oda, koba kuli agi koba teloki inyak südir sang, tanü putu nung injang bomb amshia Nagaland nung raratsübaji tamashi aser tamakok angutsüba mapa ka asütsü. Tanübo Naga yimten nüchiso temeten ken o ya injang bomb amshia masü saka asenok dak aketba yimten temeten nung amendaker jembitsüla, kechiyong asenok aliba lima ya tilaka dang aser nisunga ishika dang, anungji tangari takdang ka nungi asenok akaba aser arakzüka ajak ya repranga alitsü. Ano, nisung aikati temulung melemi bilemba amaji, Manipur nung Mete, Kuki aser Naga nung tsüngda raraba agi Nagaland dena meinprongdaktsütsü bilema inyakra, ibajia kodanga mataloktsü, kechiyong Nagaland nung alirtemi tetsübu mali tesünep nung linür. Atangji, tang Naga yimten nüchiso bushirtem telok o India na tsüngda injang bomb amshia meraratepi aliba agi Nagaland nung tetsübu ajak samaogo ta masü, kechiyong yimjung mapang ya, kechi tebilemba nungar, Naga nung telok aika küma tentetogo aser item jagi nübortemibo memetettsüa akok, saka government aser business mapa nung inyakertem nembo timtem agütsür. Item tebilemtsü ajakji mali küma tembangtsü atema India-i Naga yimten tebilemtsü ken o ya lasasa asü matai, ano tesashiba nung shia maru dang, yakta dang lemteta adoktsüla. Atangji, tanü lima nung mapa tamajung inyakertemji mita aputsübaji tasak masütsüa akok saka ano jashia alirtem asoshiibo mapa tamajung inyaktsübaji kecha tasak masü. Iba tangatetba nung yakanü Chümoukedima nung atalokba lendong indang bushisüngdang dang, India government-i Naga yimten tebilemtsü ken o ya tatemkati arutettsüa yimten telemtetba ka memenui agitsüla. Ibaji Naga nung asoshi masü India asoshi tongpang tuluka akoker asütsü.

OLEMSABANG

Mapa tajung inyaker alima nung taso shizüka alitsü

~ L.Kika Pongener

(Yashi adok nungi...)

Alima nung nisung aikati aküm-sentsü-ket dak; rongsen dak; aser nutsüng-nubu dak nendaker....Azü (Dog)-i takokba dak longshia angho-ba amai koker ta ser....Kar dakbo kanga-sa tali-tapong mezüngmeshia benshitsü akok....Ajisuaka, parnok jagibo meyipa tayang meküpzüktsü akok....Saka repranga liang....Shirnoki koker ta ser tangar dak tali-tapong mezüngmeshia; mimchir sobaliba dak tali taochi maket inyaker; iba küsaji parnok daka meyipa inyaktsüsa tensa mapang kati bentsür arutsü....Kechiyong azüklen nungi Tsüngremi nisungi inyakba mapa ajakji tenuk yoka reprangdar....!!! Ajiser, nisungi kanga-sa mejungi mezüngshir-temjia, ashiko, kenubo Tsüngremi ajungkettsü... "Temeshibai kin ka ajungkettsür" (A.Shin-14:34). Alima nung nisung mimchir lia aruba ya jungjunga bushidangra....Teti dangpo jenjang junga-ka malir aser teti dangpo jenjang mejung-ia malir....Kechiyong mimchir ya kar kenu...kar kenu....ta melentepa aliba lima nung alir. Tsüngrem o-i ashir...."Ni alartem Kor nung sanger angu; aser chubatem alar ama ali nung jaja-a angu" (Sayu-10:7). "Kibubai tajemreper ajungketer; pai tamajunger alileni aludaktsür" (T.Ken-147:6). Shirnoki tanü jenjang junga lir ta ser; nutsüng-nubu aika lir ta ser; mesura tashi (Power) lir ta ser; iba dakji nendaker tangar ajemoka yutsür....Repranga liang; mapang kabo parnokjia tangar küpok alitsüsa mapangi bentsür arutsü. Ano nisung karibo tarutsü nung pei jenjang ajungtsü aser pei lenmang sademtsü atema; tangar jenjang junga aliba atsüzüka yutsür....Saka repranga liang....Ashiko, asen sentongji Tsüngremi mulungba sentong ka mesura amman milen züksep ama asütsü aser aji mataloktsü....!!! Tsüngrem o-i ashir...."Asüng indang ne sasa mezümeküm tesu; kechiyong anogoi kechi bener arutsütsü nai memetet" (A. Shin-27:1).

Tanü putu nung nisung aikati tanü jenjang junga lir ta ser asüküma, ngasangadema, mezümeküma, tarendak tetsübo kecha meli-i temulung ulua mapa tamajung sadem-sadema inyaker. Ano takar karibo Tsüngremi moatsüba rongsen agi alima yanglutsü, alima renloktsü aser nubur ajangzüksüba lenmang nung amshitsü melena....Tesasatsü-ka, yimden, arogo aser lokti raksatsü; nisung kar dak züka merenshitsü; ashi-külak mapa inyaktsü atema supokrem agütsüba....Iba amala nung amshir. Ashiko, rongsen ya teti asen ket nung malitsü....Sensaker agi takar akümtsü tasak; saka takar agi sensaker akümtsübo mela-melar....Nisung karbo rongsen manung kanga meren-merena lia aliba; tesasatsü-ka sensakpo jenjangi alur taküm tempangba nguogo. Anungji rongsen kar ta ser ngasangadem aser mezümeküm masütsüla. Shirnoki yimden, arogo aser lokti longjema aliba raksatsü aser lemsatsü sentong atonger....Repranga liang item chirnur aser semchi-semnur tashi azükaroa taso shizüka malitsü. Anungji nisungi nguaka aser mongu-aka; metet-aka aser memetet-aka mapa tajung inyaktsüla. Shirnoki mapa tajung inyaker....Pa dak jakzüka chirnur pa dang nungi tashitemetetba asütsü....Aser par semchi-semnurjibo ano kanga agi tajungba aser tashitemetetba sotettsü. Tsüngrem o-i ashir...."Nisung tajungi pei semchi-semnur nem senmang tajung toktsür" (A.Shin-13:22). Alima nung senmang ya rongsen kisung dang senmang ta majar. Tsüngrem nungi anguba shisatsü (Wisdom) ya senmang ajak dang tajungtiba asütsü....Ano chirnur aser semchi-semnur tajung sotetbaji senmang ajak dang tajungtiba asütsü. "Ajemaluri alima temoatsü senmang amangtsü" (Mathi-5:5).

Alima nung arishi tatsüka alidang nisung ajak den putepa yimjung nung alitsü kanga tongtipang lir. Tsüngrem o-i ashir...."Kokrabang naibo nisung ajak den yimjung nung liang" (Rom-12:18). "Yimjung yanglurtem temoatsüba; kechiaser parnok dang Tsüngrem chir ta ajatsü" (Mathi-5:9). Ano alima nung tatsüka alidang nisung ajak dang tajung inyaka alitsü kanga tongtipang lir...."Ne keti inyaktsü tashi alidang; shir dang tajung inyaktsü tsüa ali parnok dang nungi soita teyu" (A.Shin-3:27). Otsüla oboula nungeri takzü-takponga jembia aruba....Lipok-lisang nung aibelenerbo anojungi arishi leptoker. Ano ali-kimong aser alu arr-ayang nung merumeroa aibelener anojungi arishi leptoker. Ano tiyazü kulisur aser tiyazü kuli agütsür anojungi arishi leptoker ta takzüa aru aser aji shitak atalok. Asenoki mapa tajung inyaka taküm junga lira; asenok teti pela-a alitsü...."Tepela mulungjangji mozü tajung" (A.Shin-17:22). Teti pelaa aliba nisungji arishia alitsü. Shirnoki tangari asen anema mapa tamajung inyaka-aka aremzüker; aser iba melena tajung meyipa agütsür....Parnokji Tsüngrem nungi maangka aser temoatsü angutsü...."Shinga nunga tamajung melena tamajung tagütsü" (Rom-12:17). "Shibai tajung melena tamajung agütsüdir; par kibong nungi tamajung mepilatsü" (A.Shin-17:13). Shirnoki ochishia aser indang-indanga mapa tajung inyaker; parnokji nisungi sentok-aka Tsüngrem-ibo mesentoktsü. Anungji asenok alima nung arishi tatsüka alidang mapa tajung inyaka nisung ajak den yimjung nung alitsü merangdi. Aji oda, sura asenok alima nung taso shizüka alitsü aser chirnur aser semchi-semnur nem senmang tajung yutsütsü.... Ajemaluri alima senmang amangtsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Indisen Baptist Arogo-i blood donation camp & awareness sentong ayongzük



Indisen Baptist Arogo Dimapur ajanga nungdi lanurtem asoshi HIV & AIDS indang awareness seminar ka July 11, 2026 nü ayongzükba nung adenertem noksa nung angur.

Dimapur, Chiteni/July 14 (TYO): Indisen Baptist Arogo Dimapur (IBAD) indang Mission Week nüngtem nung parnoki voluntary blood donation camp ka aser HIV & AIDS awareness dak rangloker lanurtem nem seminar sentong July 11, 2026 nü tenlaki kima ayongzüka liasü.

Blood donation camp ya Blood Bank, District Hospital Dimapur den lungjemer ayongzük. Iba sentong tenzüka Rev. Sentianger, Pastor, IBAD-i medical team aser azü tenlar tem asoshi temoatsü meshija sarasadema liasü.

Region nung azü agi anünga

aliba tebilemtsü tajemba kumdaktsütsü aser azü nüngdaka alir tem takum kumzüktsü nükjidong nung iba camp ya ayongzük.

Iba mapang arogopur aser temulunger temi arua angati nung azü agüja Khrista tanüla tali jangjadaktsü.

Kasa mapang Mission Board, IBAD ajanga nungdi lanurtem (teenagers) asoshi HIV & AIDS indang awareness sentong ka ayongzüka liasü. Lanurtem nem nüngdakba shisatsü agütsütsü, pei takum nung lenmang shidak nung jajadaktsütsü, meshiteta alitsü aser kibong makum tashi asüngteta alitsü

angatetdaktsütsü nükjidong nung iba sentong ya ayongzüka liasü.

Iba sentong nung Akum Amri-i metetpela mapang agia liasü aser Rev. Sentianger, Pastor IBAD ajanga sarasadem.

Sentong nung shisalen sayur Mhalelhou Albert Yhome, Councillor BYWC CiTYBARN Dimapur aser Titibeni, Councillor DISHA Dimapur liasü.

Mission Board, IBAD indang secretary Ningsangliba-i melepzüng o jembidang medical team, shisalen sayur aser arogopur tem dang pelaba lemsatepa liasü.

ANOGO ABEN TSÜNGREM DEN

Tsüngremer mulungba Tsüngremi akoker
2 Kor. 9: 6-15

Aser ajak nung teti nenok onsara teperi aka nung, mapa tajung ajak nung arentsü asoshi, Tsüngremi nenok nem taochi ajak rendaktsütsü akoker. 2 Kor. 9:8

Asenoki mapa sentong tapu balala aika yanglur. Teimla tulu nung tenzüker saka yimlaba ama mesüi atemer. Nisung shia dak tashi mait lir. Shingaia pai/lai inyaknüba ajakbo inyaktsü makok, anungji asenoki asen tejangraba asen tashi den putepa dang ayutsüla.

Meimchir tashi maittem den medem dang nung, Tsüngremi Pa nükjidong temulung lemteta inyaktsü akoker. Mezüngbuba pa tashi tendangtsü menügdaker. Nisung teimbai Tsüngremi akoker ta nangzüker.

Iba jagi asenok koda yarir? Tsüngrem tashi aser nisung tashi mait nung kechi tetsünga adoka lir, ibaji jungteptsü asoshi Tsüngremi lenmang ka bushiteta lir aser ibaji taochi lenmang. Pa taochi agi Pai asenok tashi mait angatetter, aser taochi ajanga Pai asenok yaritsü asatet. Temeim agi asenoki makokba Pai inyaktsü. Asenok alangzüktsü asoshi Pai pei chir yok.

Pai asenok meim nung taküm tia aika nung Pai Pa teyari asenok nem agütsü. Pauli ashir, "Tsüngremi ne nüngdak dang tali agütsütsü akok". Kasa Tsüngrem shibai Paul anogo nung inyak tanüa asenok dak aser asenok ajanga Pa taochi rendaktsütsü akoker.

Temeim Kibur, Nai onok ajanga atalokdaktsütsü akokba mapa tajung aser tulu bushitsü onok dak ajungshiang; Yisu asoshi.

Home Minister Amit Shah-i Khristanpur kumzüka ayutsü nangzük



Catholic Bishops Conference of India (CBCI) tir Cardinal Anthony Poola (abelen tanabuba)-i anir lenirtemi July 10, 2026 nü New Delhi nung Home Minister Amit Shah (tiyong) den ajurutepdang tangokba noksa ka yangi angur.

New Delhi, Chiteni/July 14 (Agencies): Union Home Minister Amit Shah-i Catholic bishop telok ka dang linük tesem balala nung Khristanpur anema azüdokshiba nung Khristanpur asoshi ochi obendang agütsütsü asoshi pai inyaktsü nangzük.

Catholic Bishops Conference of India (CBCI) tir Cardinal Anthony Poola-i anir züngsem pongu delegation kati Shah den New Delhi nung July 10 nü ajurutepa tamangba yimsü melendaktsüba mapa inyaker ta tai tonglokja Khristanpur aser parnok institution anema inyakba

tebilemtsü lemsatepa liasü.

"Police temi ken o mebenokra pai mera agitsü ta Shah-i onok dang nangzük," ta bishops' conference odongtar Father Robinson Rodrigues-i ashi.

Khristanpur anema inyakba shia local police nem First Information Reports (FIRs) agütsüdaktsünüa Shah-i parnok dang ashi, koba mapa tamajung inyakba anema ozüing amshi tenzüktsü nüngdakba inyakyim ka lir.

"Pai nüburtem dang FIR benoktsü memulungba densema parnoki ken o benokba nung

mera magiba indang tejangja pa dangi email asütsü ayongzük. Ochi obendang agütsütsü atema par ministry-i teka amoshitsü ta pai ashi," ta Rodrigues-i UCA News dang July 13 nü ashi.

Parnoki Shah nem Foreign Contribution Regulation Act (FCRA) melenshitsü sentong aliba nung tebilemtsü akaba tuteta tezüluba ka agütsü, kobai bendang lima nungi nüngdakbapur yaritsü atema senotsü agütsüba agizüka amshitsü azüoker.

FCRA licenses 20,000 dak tema agentsüogo mesüra mapang süyidaktsüogo, anungji

non-government organizations temi bendang lima nungi senotsü teyari anguba nokdanger, koba arogo temi timba lapoka lir, ta ashir.

FCRA yanglushitsü tebilemba aliba ya senotsü shidak amshidaktsütsü atema lir aser iba ozüing ya Khristanpur mesüra tanga tamangba yimsü anema mamshitsü ta Shah-i parnok dang ashi.

Paisa federal sorkari ozüing tasenba yagi bendangeri taoba mapang senotsü agüja aliba nung mokongshitsü ta ashi, anungji taoba mapang bendangeri tenla agütsüba amshia yangerba arogo balala shibangtsütsü ta tetsübo nung aliba samatsü.

Shah-i iba o ashiba ajanga tamangba yimsü melenba mapa inyaka ta tiazü nung tai tonglokja Khristanpur dak timtem agütsüba nung dena alirtem asoshi tangatettsü tejangja ka sayur, ta Catholic lenir aser taoba mapang Delhi state minorities commission nung züngsema alisang A. C. Michael-i ashi.

Centre nung Ato Kilonser Narendra Modi indang Hindu nunger bhukumba Bharatiya Janata Party (BJP) yimsüsüba mendeni 2014 küm aruba sülen Khristanpur anema inyakba tali kumogo ta Khristan lenirtemi

ashir. BJP yariba aser India ya Hindu linük ka kumdaktsütsü asoshi inyakba Hindu nunger telok balalai Khristan missionaries aser par institutions tem anema nokdaker aser parnoki mashi-memetet tribal nisungtem aser lower-caste nisungtem tamangba yimsü melendaktsütsü tasa balala amshir ta aitsür.

Indian states 13 nung anti-conversion laws agizükogo, koba tamangertem merenshitsü, amokmerentsü, pastors, missionaries aser tamangertem tepuokdaki yoktsü asoshi mashi lenmang nung amshir ta ashir.

New Delhi nung aliba United Christian Forum (UCF) ajanga data bendenba nung, tesüiba küm ter tsüngta Khristanpur anema azüdokshiba aser mapa tamajung inyakba tali akumba sayur, kong 2014 küm iba ama tatalokba 151 liasü aser 2024 küm 834 liasü ta ashir.

November 2025 tashinung iba ama tatalokba tejangja 706 liasü aser küm tepiyong nung 900 atongtsü takzüteta lir, ta UCF-i ashi.

India nütsüng yongsük 1.4 billion dak tema aliba nungi Khristanpur shilem 2.3 lir aser shilem 80 shi Hindu nungertem alitsü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yong

(n) au agi mejitetba talentsü (bamboo robes)

* Asen kidang teti yong akatsüla.

Yongjia

(adv) aji oda süaka (nevertheless, even if)

* Asenoki temenen mena, yongjia Tsüngremi asenok dang meim..

OLONG PAITEP # 7566

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidadong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7565 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzüik,
11. Teronem, 12. Sempa,
13. Jahaz.

**TELONGJEM ASER MEPUTEP**

Alokba : Oko, ni kenüp anüpdang yakta saker kima yimtung sema odi ta sür odang nung lenmang nungji An tetsüdi aika nokdaka liasü iba teyong nungji An tepong anaji awia atoka dang mechitepa angu, ni tena raraji bendangtsüdi ta merangdang saka katia katia mechioker aser majener odang mechitepa toktsür ni oadok ano tatsüka orbo lemjem ka nungji Azü Telok toluka kar tsüngkümteper ano tepong karbo tetsübutsüka nguteper ta ni ajuru ano ibajibo bendangtsütsüji pongmang, iba sülen ni kidangi meyipa aru nung ozü gate telong nung kima temerük nungji Meja Telok kaji taren kümer dang kati anilenidang ajakji longjemer sena aor, saka itemjibo meraratepi dang aor aser ni züingdang nung parnok metsür pongu liasü iba tetezü kechiaka?

Tain : Alokba, idangji nai calendar ajidang asü majidang? Shirurubo full moon amala nungya yamajisa asür aser mejatemji parnok teloka camp tasen tentettsü kimong bushir sülapa, saka asenok meimchirbo kija aser Telok balala pei ajungtsü asadang telemsa aser raratepsa atoker, aser meja Telok amaji telongjemjibo gate küpok nungisa atoker, saka kodang gate alema odir meimchirbo yimten Arogo lokti ajunga mezüingbo kanga longjema tenzüksü kodang küm 25 jungdir mezüing jubilee kanga pelatepa amongtsü, iba sülen küm 50/75/100 ta monga atudangbo kechi akümer? tanü lima tia sayurba dangar, nenok lanu putu kanga longjema liangma.

Alokba : Oko, tainsa taina!!!

~ Lilir : I. Kilang Ajem, Indisen , Dimapur.

Arunachal Pradesh nung tzümetsüing & anentsüh agi timtemer**Itanagar, July 14, 2026****(Agencies):** Arunachal Pradesh kübok district aika nung tzüinglu kanga aruba ajanga tzümetsüing aser anentsüh ajanga gari lenmang, apu, school aser tanga public kiojentem raksatsüogo.

Taküm tzüingluruwa mongpu nung lendong balala atalokdang nisung 7 süogo aser district 26

kübok yimtsüing 425 nung nisung 97,000 tema dak kongshiogo ta State Emergency Operation Centre (SEOC)-i metetdaksü.

Takoksa tuluba ajurubaji Kurung Kumey district lir aser idakji Kumey River nung ajungben tzümetsüing ajanga tanep Parsi-Parlo circle aser Damini subdivision

metsüingbangogo.

Parsi-Parlo nung ki aika, tenla ki ka aser Inspection Bungalow raksago, St Thomas School tzü agi metsüingbanga lir aser iba jagi class magitet ta SEOC-isa ashi.

Pakke Kessang district nunga National Highway-13 nung anentsüh tulu ka alua lir aser West Kameng nung Sela Tunnel-i aoba lenmang nung shilem ka tzü agi ponger ogo.

Alima lendong balala ajanga lenmang 150. Apu 19, culverts 21, water supply systems 221, government buildings 58, power lines 156, electric poles 224, hydel projects 10, hospitals 2 aser schools 3 raksatsüogo.

Police, paramilitary personnel aser disaster response teams-i district administration tem den yaritepa teraksa anguba asadangdar aser relief & restoration work inyaker.

Küm 2 tsüingda ozüing alema arur 1,600 tema Bangladesh-i yokogo**Guwahati, July 14, 2026****(Agencies):** Tesüiba küm ana tsüingda Assam nungi Bangladesh nunger 1,600 tema meyipa yokogo ta Chief Minister Himanta Biswa Sarma-i ashi.

AIUDF MLA Badruddin Ajmal-i Assembly nung

asüingdangba ka langzüdang "July 1, 2024 nungi June 30, 2026 tsüingda ozüing alema arur 1,679 tashi meyipa yokogo aser parnok ya legal framework kübok tim mapa inyaka jangjatetba liasü" ta CM Sarma-i ashi.

CM Sarma-i Home &

Political Department portfolio bena lir aser pai assembly nung iba dak sendakba osangtem lemsatep.

"Tesüiba küm ana tsüingda Assam nungi Bangladesh tashi nisung 1,679 tashi meyipa yokogo" ta pai ashi.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO. DTE./ ESTT-2/ 02/ 2023-24/**Dated, Kohima the
14th July, 2026.****NOTIFICATION**

On recommendation of the State Common Selection Board, the provisionally selected candidates to fill Nagaland State Reserved seats in Medical Allied and Agri& Allied courses for the academic session 2026-27 on CUET-UG 2026 Merit has been declared and uploaded on the Department website: www.dte.nagaland.gov.in and the Office Notice Board. The Provisionally selected candidates and the eligible candidates from Merit Sl. No 1 to 500 of the State CUET-UG 2026 Merit list are informed to attend the State Counselling scheduled on 23rd July, 2026 (Thursday) at 10:30 A.M. in the conference Hall of The Directorate of Technical Education, Nagaland, Kohima without fail.

Failing to attend the same shall be assumed as declined of seats.

(Er. VIPULHOU LHOUGU)
Director.

**GOVERNMENT OF NAGALAND
DIRE TORATE OF TECHNICAL EDUCATION
NAGALAND, KOHIMA**

Kohima the 14th July, 2026**NOTIFICATION**

NO. DTE/ ESTT-2/7/2019-20/This is for information of all candidates who have applied for Government State Reserved and Private Seats allotted to the State of Nagaland in the following Under-Graduate Engineering Degree Courses for the Academic Session 2026-2027, namely:

1. Agricultural Engineering
2. Biotechnology
3. Computer Science & Engineering / Artificial Intelligence & Machine Learning
4. Information Technology
5. Electronics & Communication Engineering
6. Civil Engineering
7. Mechanical Engineering
8. Food Technology
9. Electrical Engineering

That, the provisional list of selected candidates has been uploaded on the Department's website: www.dte.nagaland.gov.in.

The provisionally selected candidates are hereby informed to submit their acceptance letter to the office of the undersigned on or before 20th July 2026, latest by 12:30 PM. Counselling-cum-seat allotment of the above courses shall be held on 20th July 2026 at 1:30 PM in the Conference Hall of Directorate of Technical Education, Kohima.

Therefore, all provisionally selected candidates are informed to attend the counselling in person along with all original/requisite documents for verification.

Further, the candidates who were not included in the provisional selection list may attend the spot counselling against the vacant seats immediately after the completion of the counselling process with original documents.

(Er. VIPULHOU LHOUGU)
Director .



La Guaira, Venezuela nung menoknok 7.5 magnitude ajanga laokdaksüba ki ka nungi volunteers tem süngzü amshia jana agienba noksa nung angur. Iba lendong nung nisung 4,333 süogo aser 16,740 dak tema yiru ta Venezuelan National Assembly indang tir Jorge Rodriguez-i ashir.

Bangkok bar kitsük kirong lendong nung asür 30 jungogo

Bangkok, Chiteni/July 14 (Agencies): Thailand yimtiba Bangkok nung music bar ka arongba nung asür nisung 30 jungogo. Bangkok governor-i, kitsü kirong amala lendong nungi jenbotsü atema kistü-jensüdang anidaksü atema tetuyuba agütsür aliba sülen shitak anidak asü manikdak aji jangjatsü atema ken o kanga junga bushisüngdangtsü ta shiogo.

Thai nunger ketdangsürtemi Mongolbarnü ashiba agi, nisung 24 temang kanga mejungi yirur mozükidang anepaludar, aser nisung aika temang anepaluba sülen mozükidang nungi yokogo.

Yimti kübok Chatuchak tesem nung amendaka aliba Rong Beer Na Ladprao bar nung mi adokba ya mibenertemi ghonda tesadang ka inyaksangshiba sülen temsepa liasü.

Ken o bushisüngdanga aliba

police temi, bar ketdangsürtemi safty dak sendakba nung inyakyim sülen shitak anidaka inyak minyak aji jangjatsü atema jenjang agidar.

"Onoki ken o tejangja bushisüngdangtsü, kechisa melenshitsüla aser temzüng ozüng kechisa melenshitsüla item ajak asadangtsü atema committee ka tentetogo," ta Bangkok Governor Chadchart Sittipunt-i Mongolbarnü osangbenertem den sensaksema mapang ashi.

"Onoki mashi mapang nung tesem balala meita aotsü," ta paisa shisem.

Ketdangsürtemi ashiba agi, ceiling air conditioner ka nung electrical short circuit asüba ajanga pub nung mi jangrolokdahtsü asütsü. Iba pub ya April ita-ang asadanger liasü.

Royal Thai Police tekolakba Kittharath Punpetch-i ashiba agi, iba bar nung exits pezü liasü, saka tesülen exit ana aliba

ya nokdanga liasü asü tamshi mejungi liasü, iba indang police-i asadangdar.

Restrooms anasa aliba kishi, kong asürtem timba nguteta liasü, iba kishi ya table ka agi nokdang liasü aser sorchioddak aliba kishi nung exit temitsü raksar liasü. Ano atsüshiba kishi ka nung handle maliasü.

Police-isa, sorchioddak gas canister tem bendena liasü maliasü aser item gas yagi mi tali jangrudaktsü asü masü aji busisüngdang südar, ta Kittharath-i shisem.

Thailand Ato Kilonser Anutin Charnvirakul-i ashiba agi, ban nung shilem agia aliba musician kati power mao tsüngda sabang anasa circuit breaker ka nungi mokozü adokba ngua liasü, ta pa dang shiogo. Maneni bar telung nung langka apokba angashio go aser mokozü agi iba bar kanga kara sünga liasü.

Houthi teloki Saudi Arabia dak missile khaloktsü

Riyadh, Chiteni/July 14 (Agencies): Yemen nung Houthi teloki Saudi Arabia dak missile tem khaloktsüogo. Hombarnü Houthi puri azioker aliba airport ka nung bomb pokloktsüba atema Saudi Arabia aitsüba sülen iba ya ataloka liasü, aser iba ajanga Saudi aser Iran-i teyari agütsüba telok na ceasefire benoka küm pezü tashi merarai aruba tembangdaksüogo.

Houthi kiralongrar teloki linük south len khaloktsüba missile tem Saudi Arabia-i khadangogo, ta Yemen nung Saudi-i aniba military coalition otongdari X ajanga metetdaksü.

Houthi military otongdar Yahya Saree-i ashiba agi, parnoki Saudi Arabia kübok Abha nung international airport makogo.

Houthi teloki Saudi indang energy infrastructure tem amakba ajanga rara tenzükba sülen 2022 küm March ita rara anentsü atema tenangzüktepba ka yangluba sülen tang mezüngbuba iba telok yagi Saudi Arabia makogo.

Iran-i Saudi Arabia anütoklen aser Riyadh missile aser drone amshia amakba April ita tenangzüktepba ka yangluba sülen tajemba kümer aliba mapang tang Saudi south len iba ya atalokba ajanga tensa tamajungba küma aotsü ta bilemer.

Saudi ya Gulf nung linük tila rongnung ka lir, saka rara mapang kangabo takoksa mongui arudar. Parnoki linük anütoklen nungi anüoleni pipeline ajanga totzü export süa Strait of Hormuz kanga junga paitoktetogo.

Ajisüaka Houthis telok den mangatettep adokba ajanga tetsükdaktsü adoktsü akok, shirnoki taoba mapang Temerem tzyüim nung rongtem maka aruogo.

Hombarnü Sanaa nung international airport amakba atema Houthi movement-i Saudi Arabia aitsü aser mang ayangtsü nangzüka liasü.

Parnokisa, Sanaa airport sabanger aliba magin tashi Saudi airspace nung mayimtsü atema airline tem nem tekümdangtsü metetdaksüogo.

Sanaa airport amakba ya Yemen nung alima kintemi agizüker aliba sorkari nangzükogo. Yemen sorkar defence ministry-i ashiba agi, Iran nunger tayimtsütem manendaktsütsü atema Sanaa International Airport runway raksatsüogo.

OFFICE OF THE DIMAPUR, CHÜMOUKEDIMA, NIULAND AKHOYATSÜR TELONGJEM Headquaters : Dimapur-797112, Nagaland. **TENÜNGSANG AGÜTSÜR**

Nagaland Staff Selection Board (NSSB) ajanga 2025 küm agiba tatidang nung Wb.Imnawapang Imsong aser Wt.C.Rongsenrenla Imchen na jala tajung Kr.Tiyongnaro Imsongi takok tajung nguteta Treasuries & Accounts department nung Junior Account Assistant mapa ngutetba asoshi Akhoyatsür ajak tenüng nung DCN Akhoyatsür Telongjemi la nem tenüngsang tulu agütsür aser lar tsüraburtem dena tepela lemsateper. Lai asenok ajak nem konang tetushi aser teimla tulu bener arutsüogo.

Tsüngremi ano maneni la taküm aser mapa nübortem asoshi moajangma ta sarasademtsür.

Sd/-
T. Chubala Imsong
President, DCNAT.



Sd/-
Amongla Emkong
General Secretary, DCNAT.

US-i Iran amaker aser Tehran-i Middle East nung amaker

Dubai, Chiteni/July 14 (Agencies): America nunger Iran nunger rongnendak tesemtem maneni nokdangtsü aser Strait of Hormuz ajanga senzüba rong tem kumzüka ayutsü mechi item rong dang sen meshitsü ta US Tir Donald Trump-i shir ghonda ishika lir US-i Mongulbarnep Iran nung amak tenzük. Iran-i langzüa Middle East nung US tembar linüktem dak amak.

Iba ya ajanga rara anena atatsü, alima nung energy supply asoshi tongtipang tzyü lenmang tanaben lapoktsü aser teti asoshi rara tembangtsü atema jembishinütsü mechi interim deal ka yanglua aliba amajok kumdahtsür. Iba melen region nung ano maneni rara agi süngogo aser alima rongsenketzüng amokmerener. Tekeraba nung tangatettep kati marutetra, iba rara ya tesashiba akumtsü.

Tang rara ya strait nung rangloker, koba ajanga alima nung shishilempaba totzü tazü aser natural gas shilem 20 shi bena liasü. Iran-i iba tzyü lenmang kanga junga shibangteta rong tem dak amak aser amokmeren - anungji totzü, fertilizers aser tanga osettem nung jenjang tali akum.

Interim deal ajanga iba tzyü lenmang tanaben lapoktsü liasü, saka Iran-i iba strait ajanga aoba rong kar dak amak.

Tang US-i tashiyim amshia iba strait ya tanaben lapoktsü ta amokmerener - saka mongin temi yamaji inyaktsü atema America nunger sepai meyerijang aika Iran nung alitsüla ta ashir.

US mitkar indang Central Command ajanga ashiba agi, parnoki Iran nung tesem balala makogo, kong coastal defense systems, missile and drone sites aser maritime capabilities nung tenük yoker amak. Iran-ia aji shidak ta agizükogo saka nisung asü-amaba mesüra ki o jen raksatsüba osang kecha magütsü.

"Yamaji amakba ajanga Iranian sepaitem nem maneni takoksa tulu agütsütsü aser Strait of Hormuz nung tai maket civilian aser shishilempar rong tem amakba tashi ajema

akumtsü," ta US mitkari ashi.

Mitkar temi amakba sangdonger mapang tatsüka tsünga Trump-ia ano kanga sashia makogo ta ashi aser US-i tenokdangba tanaben benoker ta shia liasü.

Iran-i meyipier langzüa Bahrain, Jordan aser strait ajanga aoba tankers asem dak amak.

Rong ana United Arab Emirates den sendaktepa lir aser yangji mi adoka liasü. Emirati Defense Ministry-i ashiba agi, tankers Mombasa aser Al Bahiyah nung amakdang mariner ka asü aser ti yiru. Emirates-i tayang kepzüka amaktsü amokmerenogo.

Kasa mapang ozü rong ka nunga amak ta Dutch shipping firm Stolt Tankers ajanga ashi. Arabian Sea nung Oman anasa Stolt Magnesium dak amakba ajanga engine room nung mi adok, saka yangji aliba mariners ajunga kumzüka lir ta company-i ashi.

Mombasa aser Al Bahiyah nung amakba atema Iran indang paramilitary Revolutionary Guard temi tenüng agiogo aser rong tem yagi aiben tekum dangtsü asütsüba senzüka yutsü ta ashi. Iran yagi par tzyü alema oa Oman anasa strait ajanga senzüba lenmang amshiba rong tem daka amaker.

US-i Iran dak amakba tembangogo ta shir ghonda ishika lir Persian Gulf nung Iran indang Bushehr yimti nung tesem pezü nung amak ta sorkar meyong IRNA news agency ajanga ashi. Anungji Gulf Arab linük temia Iran dak parnok dak memakdaksütsü mechi amaker südi ta bilemer.

US-i tang tesüsa tayimtsü amshia amakba mechi telangzüba agüja Mongulbarnep Bahrain nunga amak. Bahrain nungya US Navy indang 5th Fleet lir aser yangji missile alert sirens asemben angashi.

Jordan indang mitkaria Iran nungi khaloktsüba missile pezü anünglak nung lia raksatsüogo ta ashi. Jordan nunga US sepaitem lir aser tawa Tehran-i iba linük nunga amaker.

Man Utd-i £48m agi Santos alizükogo; Tielemans alizüktsü ana nung lir



Chiteni/July 14, 2026 (Agencies):

Manchester United-i Brazil nunger asayar Andrey Santos Chelsea nungi pound million 48 agi alizükogo aser Aston Villa nungi Youri Tielemans alizüktsü ana nung lir.

Osang ajanga ashiba agi, Atalanta nungi pound million 35 agi Ederson alizüktsü atema United pur sentong liasü, saka pa temang nung timtem aliba ngutetba sülen thitsüogo.

United-i taoba hopta Santos atema Chelsea-i meshiba taah agütsütsü mulunga agizüker liasü, aser arishi küm 22 tain asayar ya temang tendangba sülen 2031 küm June ita tashi

asayatsü atema tenangzüktepba yangluogo.

Santos ya 2025 küm Club World Cup akokba Chelsea squad nung densema liasü aser pai taoba season asaya 43 nung asayaogo.

Santos, shiba World Cup atema meshimi liasü, pa United den training agi tenzükogo.

Iba tetezü pa pre-season campaign nung shilem agitsü akok, koba Helsinki nung July 18 nü Wrexham den asaya-a tenzüktsü.

Kasa mapang nung Tielemans atema tenangzüktepba ka yanglutsü asoshi tatembang ka dangi

arudar.

Arishi küm 29 tain asayar ya United-i mapang tatsüka asadanga aruogo. BBC Sport-i ashiba agi, Tielemans' indang Villa contract nung release clause ka densema lir, aser iba ajanga sensaksemertem asoshi mapa tezübaba kümdaktsüogo aser tenangzüktepba ya tatembang ka dangi aruba den kasa dang lir.

Belgium' pur taküm World Cup nung quarter-finals tonga asayaba mapang Tielemans-i tongtibang shilem agiogo, saka pa Spain goal 2-1 agi makokba asaya nung warm-up mapang yiruba sülen masayatetsüsa aküm.

Casemiro-i club toktsüba den Manuel Ugarte temekok yiruba sülen central midfielder nung asayatsüpur rongnung England nunger asayar Kobbie Mainoo dang anunger liasü.

Parnoki Elliot Anderson alitsü merang saka pa Manchester City-i ao aser Mateus Fernandes-ia Tottenham Hotspur-i aotsü shima liasü.

Vuskovic Spurs nungi oa Brighton nung denogo

Chiteni/July 14, 2026 (Agencies):

Brighton-i Croatia nunger defender Luka Vuskovic pound million 46 agi Tottenham nungi alizükogo, koba club-i asayar ka sen timtiba agi alizükba asütsü. Pa den küm pongu atema tenangzüktepba ka yangluogo.

Brighton-i arishi küm 19 tain asayar atema ya taoba ita anaben tashi bid asüba magizük, saka pa indang transfer fee ya pound million 50 ajungtsü akok.

Vuskovic ya 2025 küm Hajduk Split nungi Tottenham nung aden. Pa den küm ana tejakdang tenangzüktepba ka yanglur liasü.

Pa Spurs-i aruba sülen loan nung Hamburg-i yok aser pa iba

Germany club nungi taoba season asaya 30 nung asayaogo aser iba mapang Bundesliga nung goal trok idakja liasü.

Brighton head coach Fabian Hurzeler-i ashiba agi, club-i Vuskovic indang career ya kanga junga asadanga aruogo.

"Taoba season pai pa temaba jenjang nungi asayatetsü ta sayuogo aser onoki pa renloka aoba nung teyari agütsüner," ta Hurzeler-i ashi.

Vuskovic-i Hurzeler indang squad nung Netherlands centre-back Jan Paul van Hecke melentsü, shiba pound million 52 yong Spurs nung denogo.

Vuskovic ya Split nung aso aser local club Hajduk indang

academy nungi anitetba sülen pa ya Croatia indang top flight nung asayaba asayartem rongnung tanobusang (küm 16) aküm. Pa ya ano club nungi goal idaktsürtem rongnung tanobusang lir.

Bundesliga nung taoba season pa nem Rookie of the Season naroküm agütsü aser league's Team of the Year nunga pa züngoksema liasü.

Vuskovic ya Croatia tenüng nungi trokben asayar lir aser taoba ita England den World Cup group stage nunga asayaogo.

Brighton pur Premier League season tasenba ya Aston Villa den August 23 nü asaya-a tenzüktsü.



Norway tebur national football team United States nungi Oslo, Norway tonga aruba sülen fan temi pelashishia agizükba noksa nung angur.

Harshit Rana England den ODI masayatetsü

Chiteni/July 14, 2026 (Agencies):

Board of Control for Cricket in India (BCCI)-i Deobarnü England aser Zimbabwe na den taruba asayamung atema India squad nung asayar ana melenba sangdongogo.

Harshit Rana aser Varun Chakravarthy na yiruba sülen tena melentsüsa kümogo.

Fast bowler Prince Yadav-i England den ODI asayatsü aliba atema India squad nung Harshit Rana melenogo. Harshit ya hamstring yiruba ajanga masayatetsüsa kümogo.

Kasa mapang nung iba ita tatemlen Zimbabwe den T20I asayatsü aliba atema Varun Chakravarthy melena leg-spinner Ravi Bishnoi shimogo.

Bishnoi ya mezüng sangdongba squad nung densema maliasü, saka Varun hamstring yiruba aneptsü atema mapang agitsü ta jangja akümba sülen pa shimogo. Varun ya England den tatembangbuba T20I ana nunga yiruba ajanga masayateti liasü.

England den India team T20I pongu asayaba mapang Bishnoi mezüngbuba asaya ana nungbo asayaogo. Mezüngbuba asaya tzünglu aruba ajanga India team bowling maon aser tanabuba asaya nung Bishnoi-i over 20 nung run 60 agüja liasü.

Varun temang anepalutsü

atema Bengaluru nung BCCI indang Centre of Excellence (CoE)-i aotsü. Harshit Rana-a hamstring yiruba sülen CoE-i aitsü lir.

Varun ya tawa Ireland den T20I ana asayaba mapang maneni asaya tenzükshi aser England dena T20I ana asayaogo. Pa taküm IPL asayaba mapang tetsüng raksaba ajanga mpang tatsüka masayateti lir ano tang yirushiogo.

Chakravarthy, shibai England den asayaba mapang junga masayatet, pai wicket ka dang agi aser pa indang economy rate 10.28 liasü.

England ODI atema India squad: Shubman Gill (Captain), Rohit Sharma, Virat Kohli, Shreyas Iyer (Vice-Captain), KL Rahul (WK), Ishan Kishan (WK), Washington Sundar, Axar Patel, Shivam Dube, Kuldeep Yadav, Jasprit Bumrah, Prasad Krishna, Arshdeep Singh, Gurnoor Brar, Prince Yadav.

Zimbabwe T20I atema India squad: Shreyas Iyer (Captain), Vaibhav Sooryavanshi, Abhishek Sharma, Tilak Varma (Vice-Captain), Ishan Kishan (WK), Shivam Dube, Suryansh Shedge, Rinku Singh, Harsh Dubey, Prince Yadav, Yash Thakur, Ashok Sharma, Mayank Yadav, Prabhsimran Singh (WK), Ravi Bishnoi.

Japan Open: PV Sindhu 2buba round-i iogo

Chiteni/July 14, 2026 (Agencies):

Mongolbarnü Japan Open badminton asayamung mezüngbuba round nung Satwiksairaj Rankireddy tapu nung timtem adokba ajanga pa aser Chirag Shetty na masayatetsüsa aküm, ajisüaka P V Sindhu-ibo tetsür kija asaya nung Malaysia tsür Wong Ling Ching koka tanabuba round tongtetogo.

World No. 4 India nunger tebur tarep asayar yagi küm ana tashi asayamung ka danga mekokteti asayaba sülen taküm Singapore Open kokogo, saka taoba ita Indonesia Open nungia atsüngintsüsa aküm.

India team tarep asayar coach Tan Kim Her-i, tena taruba hopta China Open nunga masayatetsü, kechiyong August ita India nung World Championships masaya tsüngda Rankireddy temang tajungba kümer lidaktsüner, ta ashi.

"Taneptsü angutsü atema mapang tatsüka agitsü. World

Championships masaya tsüngda renema atatsü asoshi hopta pezübo anunga lir," ta Tan-i PTI dang ashi.

Tetsür kija asaya nung Sindhu, shiba tang world No. 10 asayar lir, lai mezüngbuba round nung world No. 37 Wong Ling Ching 21-14, 21-11 agi ayong ayonga koka liasü.

India nunger asayartem rongnungi Dhruv Kapila aser Tanisha Crasto natia tarep temeyoktep asaya nung Scotland nunger Alexander Dunn aser Julie Macpherson na 21-16, 21-14 agi koka tanabuba round tongtetogo.

Ajisüaka Rohan Kapoor aser Ruthvika Shivani Gadde nabo mezüngbuba round nung China nunger top-seeded tarep Feng Yan Zhe aser Huang Dong Ping nati 11-21, 10-21 agi tsükdaktsüogo.

Iba sayamung nung India nungersa Hariharan Amsakarunan aser MR Arjun nata tebur tarep asaya nung asayatsü lir.

BILEMDANGANG

"Sarasademba temeli dang nungibo teyari agütsüba teka temeshiba"